

全上古三代秦漢三國六朝文

全隋文卷七

烏程嚴可均校輯

煬帝四

答釋智顗遺旨文

菩薩戒弟子總持稽首和南先師天台智者內弟子灌頂普明至
奉去十七年十一月二十一日遺書七紙手迹四十六字并淨名
義疏三十一卷犀角如意蓮華香鑪等跪對脩讀摧振于心舍利
儼然德音具在迦葉狼迹身證遙追曇光天台安禪近跡誠復如
來雙林四部號慟而涅槃遺教法更殷重況乎五百歲後四依極
彌深願佛旨居世同凡將欲泥洹現希有事五品十信已自皎然
彌陀觀音親來接引去德茲永乃增悲戀追悟今生還慶夙稟所
恨淨名經疏不重親承猶冀尋研用補咎悔追惟障惱現機未發
遂聽前聞亦有成就非徒悟有淺深抑又時或早晚佛滅度後得

聖巨多道耀他方冥來曉示在思卽世忽奉大師良由宿緣積曾
親近愛覃來命必垂影響不捨本誓筆迹具存是用歸誠憑靈戒
懇跪受經疏如意香爐虔禮西方心口相誓手探卷軸最後殷勤
卽于今月十八日仍感瑞夢是知濟度已降舟航唯願卽日在寶
池遙開蓮華令居淨域近旣濁心世世生生師資不闕革凡登聖
給侍無虧但義府鉤深遺文淵博雖加策駘終畏面牆特希旣已
醍醐如出香乳照已暗井卽顯真金然後仰藉神通俯厲精力別
詢名僧奉揚法味普共含生作大利益斯則弗違提獎同登彼岸
最勝最上就此爲尊灌頂所送最後淨名義疏三十一卷至佛道
品謹卽裝治善書習讀逮旨爾前玄義及入文解釋付弟子焚之
卽付還使遣對燒蕩犀角如意蓮華香爐遠已垂別輒當服之無
毀永充法事今奉施資瓦香爐供養龕室遺旨已天台山下遇得
一處非常之好垂爲造寺始得開翦林木位置基階今遣司馬王

弘創建伽藍一尊指畫寺須公額并立嘉名亦不違旨佛隴頭陀
並各仍舊使移荊州玉泉十僧守天台者今山內現前之眾多是
渚宮之人已皆約勒不使張散豈直十僧而已所求廢寺水田已
充基業亦勅王弘施肥田良地深蒙擁護當年別資給行送經一
藏依法爲先師別供養具爐幡香等又施錢直且充日費鄧縣靈
塔吳內石像刻縣彌勒尊儀臥疾之處並使裝飾亦不仰異荊州
玉泉寺既是爲造理當異餘道場其潭州大明寺荊州十住上明
寺等先已敬許爲檀越無容復乖今諒使製南嶽師碑卽命開府
學士柳願言爲序自撰銘頌所囑僧有罪治無罪平等竊已涅槃
羯磨經有成文正論治國金光明品住持三寶弗敢墜失又令加
脩慈心撫育民庶犬馬識養人豈忘恩蓋聞外書爲教仁尚恕物
內典居宗大慈爲首在文雖異詣理實同不有君子其能爲國不
有菩薩豈濟含生又曰僧未貫籍許其出首適奉詔書冥符來及

見幾而作所謂後天而奉天時糧運轉輸深關軍國前已表聞所
司未報終當方便必期諸果及承寄囑斯復能照他心前來仰答
無違意旨庶藉熏脩福祐國家灌頂普明面引詢訪具述遺形宴
坐宛若平生轉恨失時不重餐義味仰揆定力如須彌峙法臘云
竟切願興迎一到江陽還入禪眾道俗接足人神頂禮卽當奉送
復彼山龕庶藉瞻仰能開心且深願道力不孤所請雖厚恩申報
具在願文而實宜加跌實須酬仰二僧今反輕奉報書遠拜靈儀
心鳴載咽謹和南開皇十八年正月二十日釋藏起三國
清百錄三

受菩薩戒疏

使持節上柱國太尉公揚州總管諸軍事揚州刺史晉王弟子楊
廣稽首奉請十方三世諸佛本師釋迦如來當降此土補處彌勒
一切尊經無量法寶初心目上金剛已降諸尊大權摩訶薩埵辟
支緣覺獨脫明悟二十七賢聖他心道眼乃至三有最頂十八梵

王六欲天子帝釋天王四天大五天仙龍神飛騰隱顯仕持世界作大利益守塔衛法防身護命護淨戒無量善神咸願一念之頃承佛神力俱會道場證明弟子誓願攝受弟子功德竊目識暗萌興卽如來性無明俯墜本有未彰理數斯歸物極則反欲顯當果必積子因是調御世雄備歷生死草木爲籌不可勝計恆沙集起固難思議深染塵勞方能厭離法王啟運本化菩薩譬如日出先照高山隨逗根宜權爲方便如彼眾流咸宗大海弟子基承積善生在皇家庭訓早趨貽教夙漸福理攸鍾妙機須悟恥崎嶇于小徑希優游于大乘笑止息于化城誓舟航于彼岸但問土萬行戒善爲先菩薩十受專持最上論造宮室必因基趾徒架虛空終不成立弗揆庸悞抑又聞之孔老釋門咸資鑄鑄不有軌儀孰將安仰誠復釋迦能仁本爲和尚文殊師利冥作閭梨而必藉人師顯傳聖授自近之遠感而遂通薩陀波崙罄髓于無竭善財童子忘

身于法界經有明文敢爲臆說深信佛語聿遵明導天台智顗禪

師佛法龍象童真出家戒珠因淨

一作圓淨

年將耳順定水淵澄因靜

發慧安無礙辨先物後己謙挹盛風名稱普聞眾所知識弟子所

目虔誠遙注命捐遠延每畏緣差值諸畱難亦既至止心路豁然

及披雲霧卽鎖煩惱謹曰今開皇十一年十一月二十三日總管

金城設于僧蔬飯敬屈禪師授菩薩戒戒名爲孝亦名制止方便

智度歸親奉極曰此勝福奉資至尊皇后作大莊嚴同如來慈普

諸佛愛等視四生猶如一子弟子卽日種羅臘業生生世世還生

佛家如日月燈明之人王子如大通智勝十六沙彌眷屬因緣法

成等侶俱出有流到無爲地平均六度恬和四等眾生無盡度脫

不窮結僧那于始心終大悲曰赴難博遠如法界究竟若虛空具

足成就皆滿願海楊廣和南

國清百錄二廣弘明集二十七上緇門警訓九

寶臺經藏願文

菩薩戒弟子楊廣和南、仰惟如來應世、聲教被物、慇懃微密、結集
法藏、帝釋輪王、既被付屬、菩薩聲聞、得揚大化、度脫無量、已迄于
今、至尊極勝、百王混一、四海平陳之日、道俗無虧、而東南愚民、餘
燼相煽、爰受廟略、垂清海濱、役不勞師、已時監復、深慮靈像、尊經
多同煨燼、結髮繩墨、湮滅溝渠、是已遠命、眾軍隨、方收聚、未及基
月、輕舟總至、乃命學司、依名次錄、并延道場、義府覃思、澄明所由、
用意、惟比、多得本類、莊嚴脩葺、其舊惟新、寶臺四藏、將十萬軸、因
發弘誓、永事流通、仍書願文、悉連卷後、願屬朝觀、著功始畢、今止
寶臺正藏、親躬受持、其次藏已下、則慧日法靈、道場日嚴、弘善靈
刹、此外京都寺塔、諸方精舍、而梵宮互有、小大僧徒、亦各眾寡、並
隨經部多少、斟酌分付、授者既其懇至、受者亦宜殷重、長存法本、
遠布達摩、必欲傳文、來入寺寫、勿使零落、兩失無作、前佛後佛、諒
同金口、卽教當教、靈殊玉牒、須彌山上、眾聖共持、金剛海底、天龍

盡護散在閻浮亦復如是追念繕寫之者厥誠至隆心手勤到何
量功德捨微淨財豈可稱計所資甘雨用沃焦芽能生是佛本是
般若人能弘法非道弘人恕已深恩卽是自爲今陳此意乃倡執
著若不聞警則不深固自行化他備在經律顧循菲識誠媿通方
因果相推何殊眼見豈不知獨善且最勝無爲第一樂內典法奧
自關眾僧何事區區橫相負荷但慶憑宿植生長王宮謁陞趨庭
勗存遠大出受藩寄每用祇兢非惟禮樂政刑一遵成旨而舟航
運出彌奉弗墜無容棄稷卨而同園綺變菩薩而作聲聞越用乖
方旣其不可篤信受付竊敢當仁然五種法師俱得六根清淨而
如說脩行涅槃最近徒守經律不依佛戒口便說空心滯于有無
上醫王隨病逗藥開乳舍酥爲方旣異甜冷苦熱取療亦殊譬前
後敎門別赴機性根莖枝葉受潤終齊總會津梁無不入道猶如
問孝問仁孔酬難別治身治國老意無乖殊途同歸一致百慮內

外相融義同泯合、何處有學毘曇而不成聖、執黎邪卽能悟真、師
子嚴鎧、反貼毀于羸目、象足至底、翻取諸干蜂房、心同劒戟、評論
水火、經意論意、都不如斯、通經通論、何因若此、恐施甘露、更成毒
藥、儻均味海、則致醍醐、聖御紺寶、天飛金輪雲、動納萬善于仁壽
總一乘于皆會、開發含識、濟度羣生、今所傳經、徧于宇內、眾聖潛
力、必運他方、共登菩提、早證常樂、則是弟子之伸順、弘誓于無窮
平等坦然、通遣唱白、達識體之念、隨喜也、廣弘明集
二十二

遣使入天台爲智顗建功德願文

菩薩戒弟子總持和南十方三世諸佛一切尊法三乘聖眾上界
天仙龍神他心道眼護持應現叟塞虛空無量幽顯竊聞諸佛菩
薩不捨本誓爲天人師拔濟含識次令和尙闍梨化作宗範引接
後來與佛無異資敬之重具在經律不有明導豈濟苦海匪報厚
德豈收福田遺行可追謹依佛語菩薩戒先師天台智者來踰刻

嶺遷化石城初聞訊至哀情摧衄敬惟勝行逾滿熙連佛許臨終
自說所得今聞侍者所書巨有異相稱我位居五品弟子事在法
華十住信心誠文具瓔珞于是空聲異響徧滿山房索披大衣云
觀音來至驗知入決定聚面觀彌陀靜攝遷神安坐身證久移晦
朔容相儼然斯蓋無量劫來檀慧具足深護佛法發起羣生非無
顯晦出沒其孰能于此歟有始有終者其唯聖人乎設曰辯才千
萬億偈讚師福慧終不能盡夏初遣信到山期法歲竟迎接僧臘
既滿尙疑谿谷毒厲意取氣交霜雪杯渡鏡水及屈剡下便承臥
痾豈言信次騰神淨域遂不獲重接音容再諮法味維摩義疏藹
而莫宣良由宿障根深致違心契已悔于前須補于後近于此州
禪眾舊居雖仰爲設會并就天台指畫之地則造寺塔而于彼山
頭陀之處未獲惠脩今資覽別書屬付佛法不思議事感歎銘矜
無已之誠今遣往于佛隴峯頂集眾結齋願承三寶之力速達西

方智者證知淨土記萌生生世世長爲大師弟子未得佛前早相
度脫不棄緣感弘到菩提并乞眾力爲弟子懺悔自從無明住地
目來至于今日恆沙惑障煩惱迷昏五蓋十纏輪迴界內八萬四
千塵勞增長願憑積慶及茲功德眾罪霜露慧日消除眾善普會
法雨洋溢神通道力照諸皇家寶祚靈長覃被億兆開皇十八年
正月二十九日釋藏起三國
清百錄三

天台設齋願文

菩薩戒弟子皇太子總持稽首和南十方三世法佛報佛應佛法
身應身化身諸佛所師所謂法也曰法常故諸佛亦常佛常法常
比丘僧常世間皆空而實不空諸佛妙有而實不有不有而有不
空而空至寂恬然始名至樂凡情獎報皆生極苦迷之者則生盲
喑首得之者則罔像玄珠弟子幸憑勝緣微因宿種方便齊度生
在佛家至尊皇后慈仁胎教有八王子日月燈明之恩十六沙彌

大通智勝之助。加目昔拈維海。欽尚釋門。先師天台智者顓禪師。膺請江都。授菩薩戒。由是開悟。歸憑有在。而夢極託諷。梁木先積。合掌安禪。端坐示滅。于今數載。儼然若思。適現儀形。續放光燄。彈指之聲。震于龕室。僧使報述。遐邇響應。皆由佛法僧力。感應相關。汲引含靈。故現斯瑞。肅奉明詔。暫輟監國。巡慰淮海。銜願毗黎。思報佛恩。少酬師道。已今大隋仁壽元年歲次辛酉十二月十七日。謹遣員外散騎侍郎通事舍人張乾威。到天台山寺。敬設蔬飯。雖調八水。多慙百味。庶同純陀之末供。有如淨名之遙請。色香細軟。徧滿十方。歡喜甘餐。虛唯百億。天仙龍神。竝希雲布。任持世界。盡望星羅。已智者之分身。納師資之攝受。經稱信爲能入。智爲能度。願消甘露。咸濟苦海。應變穢土。通同淨國。天覆地載。長轉金輪。七廟六宗。永安玉座。本支百世。紹隆萬紀。男女緇素。皆染大乘。水陸空行。咸知佛性。須彌入于芥子。未足成難。食頃猶如亘劫。曷已爲。

怪井蛙不識江海、蚊睫安知鵬翼、曰我今懺竝乞冰消、曰我今誠
皆入願海、發菩提心、徧在諸物、菩提心者、卽是佛心、下度眾生、上
求佛果、不可曰身得、不可曰心得、曰無所得、卽菩提心、無所得卽
是得、無所得、稽首歸命十方三寶、同上

祭告智顗文

維隋仁壽元年歲次辛酉十二月十七日景寅菩薩戒弟子皇太
子總持和南敬告天台山寺先師智者全身舍利靈龕之座、粵竊
聞民生在三事之如一、皆資聖範、能達賢功、顏回不值宣尼、豈鄰
殆庶、尹喜不逢老氏、安致長齡、況乎乘般若之舟、望菩提之岸、弗
有明導、豈至寶所、復因信受、俱次法城、所謂自利利他人、我兼利
師及弟子、智斷具足、抑又聞曰、疏傳告老、太子贈曰、黃金桓師、退
辭家庭、陳于喪服、斯竝有爲方內、少用報恩、豈臻無際空表、盡酬
師力、弟子宿植德本、早承道教、身戒心慧、蒙瑩明珠、早穗寒英、盡

沾甘露。雖復時流歲。永生滅不追。行住坐臥。伏膺如在。爰曰景昧。
謬齒元良。守器非才。昇離多懼。復承明詔。製經作伯。暫輟監撫。還
省宸方。瞻望天台。有如地踊。僧使續來。龕瑞重疊。多寶妙塔。如意
分身。玉蒙金光。分宵破闇。應念彈指。自室空聲。有一于此。已稱顯
瑞。四者難并。豈非希有。自曇光坐滅之後。道猷身證已來。興公飛
錫。所不能稱。靈運山居。未有斯事。盛矣哉。是我大師證道之基趾
也。至矣哉。是我良田之報歲也。詩云。無言不酬。無德不報。經稱。知
恩報恩。諸佛皆爾。近年雖遵誠約。脩構祇桓。多慚布金。止因山宇
庶同心。淨域勝土莊嚴。幸僧眾無虧。熏練不輟。冥力深扶。人功多
愧。今遣員外散騎侍郎兼通事舍人張乾戚。送僧使。權頂等還山。
于寺設會。稽首接足。十方三世。一切三寶。無量幽顯。現前大眾。目
此功德。仰資先師智者。早證正覺。具如臨終。證現已生。安養。頃來
畱瑞久現。彌陀踵武。觀音連衡。大勢迴眸。東顧不捨。娑婆轉睞。南

閻彌憐震旦、滄溟巨海、尚不讓于涓流、嵩華峻極、安苟掛于微埃、
敢陳薄供、願垂攝受、當使無邊法身、盡承甘露、無量化影、咸進醍
醐、涅槃餐之、不可窮、般若味之、而不厭、盡我念力、遵我師道、銷我
煩惱、滿我誓願、現在未來、長惠拔提、家國眷屬、俱入大乘、密往潛
來、恆垂影響、塵勞障累、銷除隱塞、究竟等虛空、圓滿如法界、斯則
大師勝力、諸佛荷擔、弟子銜慈、出如來藏、無離文字、已求解脫、文
字之性、卽解脫也、不著世間、如蓮華常善入于空寂、行達諸法相、
無罣礙、稽首如空、無所依、同上

賜進士出身二品銜廣東等處提刑按察使司按察使兼管驛傳事務黃岡王毓藻校刊

全隋文卷八

烏程嚴可均校輯

恭帝

帝諱侑，元德太子昭之子。大業二年，封陳王。後徙封代王，遼東之役，留鎮京師。十一年，從幸晉陽，拜太原太守。尋還鎮京師。十三年十一月，卽位。遙尊煬帝爲太上皇。改元義寧。在位二年，禪于唐，封鄴國公。武德二年崩，諡曰恭皇帝。

改元大赦詔 義寧元年十一月壬戌

王道喪亂，天步不康。古往今來，代有其事。屬之于朕，逢此百罹。彼蒼者天，胡寧斯忍。繼繼之歲，夙遭憫凶。孺子之辰，太上播越。興言感動，實疚于懷。太尉唐公膺期作宰，時稱舟楫。大拯橫流，糾合義兵。翼戴皇室，與國休戚。再匡區夏，爰奉明詔。孺子幼沖，顯命光臨。天威咫尺，對揚尊號。悼心失圖，一人在遠。三讓不遂，俛俛南面。曆

身無所苟利社稷莫敢或違俯從羣議奉遵聖旨可大赦天下改
大業十三年爲義寧元年十一月十六日昧爽日前三大辟罪已下
皆赦除之常赦所不免者不在赦限隋書恭帝紀

委任唐王詔

義寧元年十一月丙寅

朕惟孺子未出深宮太上遠巡追蹤穆滿時逢多難委當尊極辭
不獲免恭已臨朝若涉大川罔知所濟撫躬永歎憂心孔棘民之
情僞曾未之間王業艱難載云其易頓股肱戮力上宰賢良匡佐
冲人輔其不逮軍國機務事無大小文武設官位無貴賤憲章賞
罰咸歸相府庶續其凝責成斯屬巡聽前史茲爲典故因循仍舊
非曰徒言所存至公無爲讓德隋書恭帝紀

遜位唐王詔

義寧二年五月戊午

天禍隋國大行太上皇遇盜江都酷甚望夷豐深驪北憫予小子
奄逮丕覺哀號承感心情靡濟仰惟荼毒仇復靡申形影相弔罔

知啟處相國唐王。唐則命世扶危拯溺。自北徂南。東征西怨。總九
合于一匡。波百勝于千里。糾率夷夏。大庇氓黎。保乂朕躬。繫王是
賴。德侔造化。功格蒼旻。兆庶歸心。麻數斯在。屈爲人臣。載違天命。
在昔虞夏。揖讓相推。苟非重華。誰堪命禹。當今九服崩離。三靈改
卜。大運去矣。請避賢路。兆謀布德。願已莫能。私僮命駕。須歸蕃國。
予本代王。及予而代。天之所廢。豈期如是。庶憑稽古之聖。目誅四
凶。幸值惟新之恩。預充三恪。雪冤恥于皇祖。守禋祀爲孝孫。朝聞
夕殞。及泉無恨。今遵故事。遜于舊邸。庶官羣辟。改事唐朝。宜依前
典。趣上尊號。若釋重負。感泰兼懷。假手真人。俾除醜逆。濟濟多士。
明知朕意。隋書恭帝紀 遜王側
詔書編入群德音文

楊蕭皇后

后南蘭陵人。後梁明帝之女。開皇中。策爲晉王妃。煬帝卽位。立
爲皇后。江都之變。沒于宇文化及。化及敗。沒于竇建德。尋爲突

厥處羅可汗所迎至唐貞觀四年突厥破滅歸于京師二十一年殂諡曰愍

述志賦

并序

帝每遊幸后常不隨從時后見帝失德心知不可不敢厝言因爲述志賦曰自寄其詞曰

承積善之餘慶備箕箒于皇庭恐修名之不立將負累于先靈廼夙夜而匪懈實寅懼于玄冥雖自強而不息亮愚蒙之多滯思竭節于天衢才追心而弗逮實庸薄之多幸荷隆寵之嘉惠賴天高而地厚屬王道之昇平均二儀之覆載與日月而齊明廼春生而夏長等品物而同榮願立志于恭儉私自兢于誠盈孰有念于知足苟無希于濫名惟至德之弘深情不遘于聲色感懷舊之餘恩求故紉于宸極叨不世之殊眚謬非才而奉職何寵祿之踰分撫智襟而未識雖沐浴于恩光內慚惶而累息願微躬之寡昧思令

淑之良難實不違于啟處將何情而自安若臨深而履薄心戰慄其如寒夫居高而必危每處滿而防溢知恣夸之非道乃攝生于冲謐嗟寵辱之易驚尙無爲而抱一履謙光而守志且願安乎容膝珠簾玉箔之奇金屋瑤臺之美雖時俗之崇麗蓋哲人之所鄙愧絺綌之不工豈絲竹而喧耳知道德之可尊明善惡之由已屏羈縻之俗慮乃服膺于經史綜箴誡以訓心觀女圖而作軌遵古賢之令範冀福祿之能綏時循躬而三省覺今是而昨非嗤黃老之損思信爲善之可歸慕周姒之遺風美虞妃之聖則仰先哲之高才慕至人之休德質菲薄而難蹤心恬愉而去惑乃平生之耿介實禮義之所遵雖生質之不敏庶積行以成仁懼達人之蓋寡謂何求而自陳誠素志之難寫同絕筆于獲麟

隋書蕭皇后傳北史蕭皇后傳文苑

英華九

十七

廢太子男

勇字颯地伐文帝長子周世呂武元軍功封博平侯大象中立
爲隋世子拜大將軍左司衛封長寧郡公出爲洛州總管東京
小冢宰徵還進上柱國大司馬領內史御正及受禪立爲皇太
子開皇二十年廢爲庶人及文帝崩矯詔賜死追封房陵王
上書諫徙流民實邊

竊呂導俗當漸非可頓革戀土懷舊民之本情波避流離蓋不獲
已有齊之末主闇時昏周平東夏繼呂威虐民不堪命致有逃亡
非厭家鄉願爲羈旅加呂去年三方逆亂賴陛下仁聖區宇肅清
鋒刃雖屏瘡痍未復若假呂數歲沐浴皇風逃亂之徒自然歸本
雖北夷猖獗嘗犯邊烽今城鎮峻峙所在嚴固何待遷配呂致勞
擾臣呂庸虛謬當儲貳寸誠管見輒呂塵聞

隋書房陵王勇傳

秦王俊

俊字阿祗文帝第三子開皇元年封秦王尋拜上柱國河南道

行臺尚書令雒州刺史加右武衛大將軍遷秦州總管又遷山
南道行臺尚書令伐陳之役爲行軍元帥屯漢口尋授揚州總
管鎮廣陵轉并州總管徵還京師免官復拜上柱國薨諡曰孝
王

伐陳檄蕭摩訶等文

文苑英華此題爲侯莫陳悅檄蕭摩訶等文
原校云悅西魏永熙三年卒隋伐陳曰侯莫

陳穎爲行軍總管悅當作穎梅鼎祚云隋書穎本傳穎從秦王俊
出魯山道伐陳又秦王俊傳俊爲山南道行軍元帥督三十總管
屯漢口爲上流節度則此檄稱寡人乃秦王俊如晉王廣
檄陳江總等稱寡人也今日屬秦王然不曉何人筆耳

夫文軌未同江湖致阻風雲密邇良用依然肇歲猶寒想如宜也
經始戎務念日勞懷寡人肅稟天策爰征不庭懸旌秣馬今次楓
岸夫時有盛衰運有興滅積德必慶延後嗣長惡則祚不及遠陳
氏往因際會竊有金陵蒨瑱承立還相屠害叔寶嗣僞彌復忍虐
沈酗日增內荒愈甚雕牆峻宇加錦繡于土木嚴刑酷法陷人物
于塗炭諫士喪身元良箝口無道之極自古罕聞有一于此何可

不滅斯皆公等所悉。素匪寓言。我皇誕膺靈命。光臨大寶。再闢乾坤。重懸日月。歷代通誅之寇。曠古不羈之民。感我仁風。成沐至道。唯彼吳越。猶未革心。主上義存字小。含目寬大。冀能撫育彼民。守其封域。而窮兇極暴。日就月將。士庶無聊。人神共憤。乞師繼軌。獻款相尋。愍彼黎元。實興我役。已有別詔。止廢僞主之身。此外士民咸從蕩滌。西自巫峽。東達滄海。巨艦覆波濤。樓船出雲霧。瓜步六合。當腹心之衝。渚宮漢口。據上游之勢。曲江鎮揚。據其要津。鐵馬介夫。千羣萬隊。攘袂扼腕。唯所用之。彼國兵士。多少備見。目寡御眾。理在非敵。救首救尾。將何旨及。況復士無鬪心。人懷二志。身雖擐甲。情在倒戈。假使穰苴更生。孫武猶在。亦不能施其智略。況異昔日者乎。往者呂梁之師。一舉殲滅。淮南之地。二旬悉平。彼之將帥。皆奔走之餘。何可用也。世公早涉戎旅。備經征行。安危之勢。如近目前。得喪之機。若觀掌內。呂國家今日之盛。僞主若猶可全。爲

其展效容復可爾江東雖立有識同知陳氏必亡賢愚共見天之
所廢誰能興之既無所成徒自傾覆夫毒蛇螫手壯士斷腕豈不
惜其肌骨所存者大也公若轉禍爲福因機立功豁然奮飛共弘
大業則江東士眾免于鋒刃之苦天下生民欣然太平之世公當
位極台鼎福延子孫爰及宗族咸加榮寵豈與夫不識天命拒我
王師舉死扶傷履涉膏血同年共日而語哉斯皆肝膈至言成敗
大理幸非可惑宜早圖之

文苑
英華

與釋智顗書

冬暮寒切道體何如法務勤辛有已勞念安州方等寺奉爲皇帝
修立屈法師向彼行道甚不可言已令所司發遣供給願已熏修
爲懷不憚利涉也道深敬德遣白不具弟子楊俊和南十二月十
七日

釋藏起二圖
清百錄二

第二書

傾仰每深甚熱禪師道體何如修習不乃勞心也夫由有展企結
良溪願珍德造白不具弟子楊俊和南五月十九日奉施沈香等
如別至願檢領沈香十斤賤香十斤熏陸少許右牒薄申供養上
蜀王秀

秀文帝第四子開皇元年封越王尋徙封蜀王拜柱國益州刺
史進上柱國西南道行臺尚書令罷還爲內史令右領軍大將
軍尋復鎮蜀仁壽二年徵還廢爲庶人幽內侍省煬帝卽位禁
錮如初字文化及行弑并遇害

幽廢上表

臣已多幸聯慶皇枝蒙天慈鞠養九歲榮貴唯知富樂未嘗憂懼
輕恣愚心陷茲刑網負深山岳甘心九泉不謂天恩尙假餘漏至
如今者方知愚心不可縱國法不可犯撫膺念咎自新莫及猶望
分身竭命少荅慈造但已靈祇不祐福祿消盡夫婦抱思不相勝

致只恐長辭明世永歸泉壤伏願慈恩賜垂矜愍殘息未盡之間
希與瓜子相見請賜一穴令骸骨有所隋書庶人秀傳秀幽內侍省乃上表

漢王諒

諒字德章一名傑文帝第五子開皇元年封漢王尋爲雍州牧
加上柱國右衛大將軍轉左衛出爲并州總管文帝崩徵不起
發兵反爲楊素所敗尋降除名爲民絕屬籍曰幽死

宣揚正法教

寡人備是帝子民父莅政此藩召請法師等遠來降趾道不虛運
必藉人弘正欲闡揚佛教使慧日清朗兆庶蒙賴法之力也宜銓
舉業長者可于大興國寺宣揚正法續高僧傳諒鎮晉陽造內城寺引釋志念等居之又令諸

議參軍王頴宣教

觀王雄

雄初名惠文帝族子仕周武帝爲太子司旅下大夫進上儀同

封武陽縣公、遷右司衛上大夫、大象中、進爵邗國公、出爲雍州別駕、授柱國、雍州牧、領文帝相府、虞候、進上柱國、隋受禪、除左衛將軍、兼宗正卿、遷右衛大將軍、封廣平王、拜司空、尋改封清漳王、仁壽初、改封安德王、大業初、授太子太傅、檢校鄭州刺史、事、尋授懷州刺史、徵拜京兆尹、改封觀王、檢校左翊衛大將軍、薨年七十一、贈司徒、諡曰德王。

若詔廢太子勇

至尊爲百姓割骨肉之恩、廢黜無德、實爲大慶、天下幸甚、隋書房陵王勇傳

慶舍利感應表

臣雄等言、臣聞大覺圓備、理照空有、至聖虛凝、義無生滅、故雖形分聚芥、尙貯金甌、體散吹塵、猶興寶刹、自釋提請灰之後、育王建塔已來、未有分布舍利、紹隆勝業、伏惟皇帝積因曠劫、宿證菩提、

降迹入王、護持世界、往者道消在運、仁祠廢毀、慈燈滅影、智海絕流、皇祚既興、法鼓方震、區宇之內、咸爲淨土、生靈之類、皆覆梵雲、去夏六月、爰發詔旨、延請沙門、奉送舍利于三十州、自十月十五日同時起塔、而蒲州棲巖寺規模置塔之所、于此山上、乃有鐘鼓之聲、舍利在講室內、其夜、前浮圖之上、發大光明、爰及堂裏、流照滿室、將置舍利于銅甬、又有光若香鑪、乘空而上、至浮圖寶瓶、復起紫焰、或散或聚、皆成蓮華、又有光明于浮圖上、狀如佛像、花趺宛具、停住久之、稍乃消隱、又有光明繞浮圖寶瓶、蒲州城內仁壽寺僧等、遙望山頂、光如樓闕、山峰澗谷、昭然顯見、照州城東南一隅、良久不滅、其棲巖寺者、卽是太祖武元皇帝之所建造、又華州置塔之處、于時雲霧大雪、忽卽開朗、正當塔上有五色相輪、舍利下訖、還起雲霧、皇帝皇后又得舍利、流輝散彩、或出或沈、自非至德精誠、道合靈聖、豈能神功妙相、致此奇特、臣等命偶昌年、旣覩

太平之世、生逢善業、方出塵勞之境、不勝抃躍、謹拜表陳賀、

廣弘明集十七
隋安德王雄等

讓改封觀王表

臣早逢興運、預班末屬、有命有時、藉風雲之會、無才無德、濫公卿之首、蒙先皇不次之賞、荷陛下非分之恩、久奈台槐、常慮盈滿、豈可仍叨匪服、重竊鴻名、臣實面牆、敢緣往例、臣誠昧寵、交懼身責、昔劉賈封王、豈備三階之任、曹洪上將、寧超五等之爵、況臣衮章、踰于帝子、京尹亞于皇枝、錫土作藩、鈕金開國、于臣何已、自處在物、謂其乖分、是日露款執愚、祈恩固守、伏願陛下曲留慈照、特鑒丹誠、頻觸宸嚴、伏增流汗、

隋書觀德王雄傳

齊王陳

陳字世祖、小字阿孩、煬帝第二子、開皇中、封豫章王、授內史令、仁壽初、拜揚州總管、煬帝即位、遷豫州牧、進封齊王、轉雍州牧、

尋徙河南尹開府儀同三司罷歸從幸江都爲宇文化及所害
臨淮海下教延沙門智聚

弟子下車舊楚亟改炎涼邀聽清規其來有日敬承幽栖山谷多
歷年所道風勝氣獨擅當今故曰德冠林遠道超生什炳斯慧炬
曰悟羣迷獨步江東何甚之美未獲稽疑下筵滄承高義杼軸之
勞載盈懷抱據虎之岫川途不遙翔鷺之濤風煙相接必願振烈
辱之衣赴翹勤之望

續高僧傳梁智聚姓朱佐虎上東山寺陳作牧淮海乃降教書此之

遺崔曠書

昔漢氏西京梁王建國平臺東苑慕義如林馬卿辭武騎之官枚
乘罷弘農之守每覽史傳當切怪之何乃脫略官榮棲遲藩邸曰
今望古方知雅志彼二子者豈徒然哉足下博聞強記鉤深致遠
視漢臣之三篋侶涉蒙山對梁相之五車若吞雲夢吾兄欽賢重
士敬愛忘疲先築郭隗之宮常置穆生之醴今者重開土宇更誓

山河地方七百牢籠曲阜城兼七十包舉臨淄大啟南陽方開東
閣想得奉飛蓋曳長裾藉玳筵躡珠履歌山桂之偃蹇賦池竹之
檀欒其崇貴也如彼其風流也如此幸甚幸甚何樂如之高視上
京有懷德祖才謝天人多慙子建書不盡意寧俟繁辭隋書隱逸
崔廓傳又

見文苑英華
六百九十三

與逸人王眞書

夫山藏美玉光照廊廡之間地蘊神劍氣浮星漢之表是知毛遂
穎脫義感平原孫惠文詞來遷東海願循寡薄有懷髦彥籍甚清
風爲日久矣未獲披覲良深延遲比高天流火早應涼飈陵雲仙
掌方承清露想攝衛攸宜與時休適前園後園從容上壑之情左
琴右書蕭蕭散煙霞之外茂陵謝病非無封禪之文彭澤遺榮先有
歸來之作優游儒雅何樂如之余屬當藩屏宣條揚越坐棠餘訟
事絕詠歌攀桂摘詞眷言高邁至于揚旌北渚飛蓋西園託乘乏

應劉置醴闕中穆、背淮之賓、徒聞其語、趨燕之客、罕值其人、卿道
冠鷹揚、聲高鳳舉、儒墨泉海、詞章苑圃、棲遲衡泌、懷寶迷邦、徇茲
狗善、良已於悵、今遣行人、且宣往意、側望起予、甚于飢渴、想便輒
舉、副此虛心、無信投石之談、空慕鑿垣之逸、書不盡言、更慚詞費、

簡書王貞傳文苑
英華六百八十八

賜進士出身三品銜廣東等處提刑按察使司按察使兼管驛傳事務黃岡王毓藻校刊

全隋文卷九

烏程嚴可均校輯

陽休之

休之字子烈右北平無終人魏前軍將軍固子爲州主簿孝昌中避亂入都孝莊時累遷冠軍長史孝武時出爲驃騎賀拔勝荊州長史隨府轉行軍右丞南道軍司從勝奔梁天平中還魏爲齊文襄開府主簿隨府轉行臺郎中元象初封新泰縣伯武定中累遷中軍將軍幽州大中正兼侍中齊受禪除散騎常侍別封始平縣男歷事文宣廢帝孝昭武成後主至尙書右僕射封燕郡王齊亡入周除開府儀同歷納言中大夫太子少保大象末進位上開府除和州刺史至隋開皇二年免卒于洛陽年七十四有幽州古今人物志三十卷集三十卷

陶潛集序錄

余覽陶潛之文辭采雖未優而往往有奇絕異語放逸之致棲託
仍高其集先有兩本行于世一本八卷無序一本六卷并序目編
比顛亂兼復闕少蕭統所譌八卷合序目傳誄而少五孝傳及四
八目然編次有體次第可尋余頗賞潛文已爲三本不同恐終致
忘失今錄統所闕并序目等合爲一帙十卷已遺好事君子陶淵明集

宋本
崔猷

猷字宣猷博陵安平人魏幽州刺史挺孫仕魏爲員外散騎侍
郎領大行臺郎中歷通直散騎侍郎攝尙書駕部郎中晉泰初
除征虜將軍司徒從事中郎永熙中入關呂本官奏門下事大
統初兼給事黃門侍郎封平原縣伯正除黃門加中軍將軍除
司徒左長史加驃騎將軍遷京兆尹除大都督驃騎將軍浙州
刺史加車騎大將軍儀同三司進侍中驃騎大將軍開府本州

大中正賜姓宇文氏恭帝時授梁州刺史周受禪進爵固安縣公明帝卽位徵拜御正中大夫武成末除司會中大夫武帝卽位重授梁州刺史尋復爲司會建德中山爲同州司會徵拜小司徒加上開府儀同大將軍隋受禪授大將軍進爵汲郡公開皇四年卒諡曰明

建議遵秦漢稱皇帝建年號

世有澆淳運有治亂故帝王曰之沿革聖哲因時制宜今天子稱王不足曰威天下請遵秦漢稱皇帝建年號周書崔暕傳世宗卽位時依周禮稱天王又不建年號暕曰爲云云朝議從之

復王思政書

夫兵者務在先聲後實故能百戰百勝曰弱爲疆也但襄城控帶京洛實當世之要地如有動靜易相應接潁川旣鄰寇境又無山川之固賊若充斥徑至城下輒曰愚情權其利害莫若頓兵襄城

爲行臺治所潁川置州遣郭賢鎮守則表裏膠固人心易安縱有
不虞豈能爲患

周書崔
猷傳

崔仲方

仲方字不齊猷子仕周爲宇文護參軍轉記室遷司玉大夫授
平東將軍銀青光祿大夫封石城縣男授儀同進封范陽縣侯
宣帝時爲少內史隋受禪進位上開府轉司農少卿封安固縣
公拜號州刺史轉基州刺史加開府轉會州總管仁壽初遷代
州總管煬帝卽位進位大將軍拜民部尙書轉禮部尙書坐事
免尋爲國子祭酒轉太常卿歷上郡信都太守致仕卒年七十
六

上書論取陳之策

臣謹案晉太康元年歲在庚子晉武平吳至今開皇六年歲次景
午合三百七載春秋寶乾圖云王者三百年一綱法令三百之期

可謂備矣。陳氏草竊起于景子。至今景午。又子午爲衝。陰陽之忌。昔史趙有言曰。陳顓頊之族爲水。故歲在鶉火。日滅。又云。周武王克商。封胡公滿于陳。至魯昭公九年。陳災。裨竈曰。歲五及鶉火。而後陳亡。楚克之。楚祝融之後也。爲火正。故復滅陳。陳承舜後。舜承顓頊。雖太歲左行。歲星右轉。鶉火之歲。陳族再亡。戊午之年。鳩虞運盡。語迹雖殊。攷事無別。皇朝五運相承。感火德而王。國號爲隋。與楚同分。楚是火正。午爲鶉火。未爲鶉首。申爲寶沈。酉爲大梁。旣當周秦晉趙之分。若當此分。發兵將得歲之助。目今量古。陳滅不疑。臣謂午未申酉。竝是數極。蓋聞天時不如地利。地利不如人和。況主聖臣良。兵強國富。動植同心。人神叶契。陳旣主昏于上。民譴于下。險無百二之固。眾非九國之師。夏癸殷辛。尙不能立。獨此島夷而稽天討。伏度朝廷自有弘謨。但芻蕘所見。冀申螢爝。今唯須武昌已下。漸和滁方。吳海等州。更帖精兵。密營渡計。益信襄荊基。

郢等州速造舟楫多張形勢爲水戰之具蜀漢二江是其上流水
路衝要必爭之所賊雖于流頭荆門延洲公安巴陵隱磯夏首蘄
口益城置船然終聚漢口峽口曰水戰大快若賊必曰上流有軍
令精兵赴援者下流諸將卽須擇便橫渡如擁眾自衛上江水軍
鼓行目前雖恃九江五湖之險非德無已爲固徒有三吳百越之
兵無恩不能自立

隋書崔仲方傳

崔墮

墮字祖濬仲方族人開皇初射策高第除校書郎轉協律郎母
憂去職徵爲河南豫章二王侍讀及河南爲晉王轉記室參軍
王入東宮除太子齋師遷舍人曰疾歸徵授起居舍人大業中
爲鷹揚長史遷越王長史字文化及行弑引爲著作郎稱疾不
起卒年六十九

若詔問藍田玉人

謹案漢文已前未有冠幘卽是文帝以來所制作也臣見魏大司農盧元明撰嵩高山廟記云有神人曰玉爲形像長數寸或出或隱出則令世延長伏惟陛下應天順民定鼎嵩雒岳神自見臣敢稱慶隋書隱逸崔廓傳盧田令王墨于藍田山得一玉人長三尺四寸著大領衣冠幘奏之詔問羣臣其有識者隨答

荅豫章王書

一昨伏奉教書榮貺非恆心靈自失若乃理高象繫管輅思而了解事富山海郭璞注而未詳至于五色相宣八音繁會鳳鳴不足喻龍章莫之比吳札之論周頌詎盡揄揚郢客之奏陽春誰堪赴節伏惟令王殿下稟潤天潢承輝日觀雅道邁于東平文藝高于北海漢則馬遷蕭望晉則裴楷張華雞樹騰聲鴈池播美望我清塵悠然路絕祖濬燕南賁客河朔情遊本無意于希顏豈有心于慕蘭未嘗聚螢映雪懸頭刺股讀論唯取一篇披莊不過盈尺況復桑榆漸暮藜藿屢空舉燭無成穿楊盡棄但曰燕求馬首薛養

雞鳴、繆齒、鴻儀、虛班、驥阜、挾泰山而超海、比報德而非難、堙崐崙、目爲池、匹酬恩而反易、忽屬周桐、錫瑞、唐水承家、門有將相、樹宜桃李、眞龍將下、誰好有名、濫吹先逃、何須別聽、但慈旨抑揚、損上益下、江海所目稱王、丘陵爲之不逮、曹植儼預聞高論、則不隕令名、楊修若叨在下風、亦詎虧潛德、無任荷戴之至、謹奉啟曰、聞

隱逸崔廓傳又北史八十八

袁聿修

聿修字叔德、陳郡項人。一云陽夏人、魏都官尙書翻子、太昌中、爲太保府西閣祭酒、歷五兵、左民郎中、武定末、爲太子中舍人、齊天保初、除太子庶子、行博陵太守、尋兼太府少卿、轉大司農少卿、太寧初、除太常少卿、河清中、加冠軍輔國將軍、除吏部郎中、遷司徒左長史、加驃騎大將軍、兼御史中丞、司徒錄事參軍、遷祕書監、天統中、出爲信州刺史、武平中、除都官尙書、轉吏部

尚書齊亡人周授儀同大將軍吏部下大夫大象末除東京司
宗中大夫隋受禪加上儀同遷東京都官尚書入除都官尚書
開皇二年出爲熊州刺史卒年七十二

與邢劭書

今日仰遇有異常行瓜田李下古人所慎多言可畏譬之防川願
得御覽此心不貽厚責北齊書袁聿修傳太監初聿修召太常少
卿出使經歷兗州時邢劭爲兗州刺史別
後遣送白紬爲信聿修退紬不受與邢書
云云又見御覽二百二十九引三國典略

斛斯徵

徵字士亮廣牧富昌人周書作河
南洛陽人魏太傅尚書令椿第三子從

孝武西遷累遷太常卿恭帝末拜司樂中大夫入周進驃騎大
將軍開府宣帝卽位遷上大將軍太宗伯呂諫下獄亡命遇赦
免隋受禪例復官除太子大傅開皇四年卒諡日闇有樂典十
卷

奏駁鄭譯新樂

禮云十二律轉相生聲五具在十六焉六律十二管還相爲宮然詳一笙十六管總一百九十二管既無相生之理又無還宮之義臣恐鄭聲亂樂未合于古夫音樂之起本于人心天之應人有如影響爲善者天報之曰福爲惡者天譴之曰殃故舜彈五絃之琴歌南風之詩而天下化紂爲朝歌北里之音而社稷滅是知樂也者和性情移風俗動天地感鬼神禍福所基盛衰攸繫安可不慎哉案譯之所爲不師古始若呂月奏一笙則鐘鼓諸色各須一十有二雅樂之備已充廟庭今若益之于何陳列方須更闢階墀增修廊宇非急之務豈可勞人如謂笙管之外不須加造則樂之損益豈繫于笙進退無據竊謂不可

北史四十九

李士謙

士謙字子約趙郡平棘人魏徵士謚子廣平王贊辟開府參軍

齊吏部尙書辛術召署員外郎趙王徽舉德行皆不就開皇八年卒

論刑罰

帝王制法沿革不同自可損益無爲頓改今之賊重者死是酷而不懲也語曰人不畏死不可已死恐之愚謂此罪宜從肉刑則其一趾再犯者斷其右腕流刑則去右手三指又犯者下其腕小盜宜黥又犯則落其所用三指又不悛下其腕無不止也無賴之人竄之邊裔職爲亂階適所召戎矣非求治之道也博奕淫游盜之萌也禁而不止黥之則可

隋書隱逸李士謙傳又見北史三十三

李穆

穆字顯慶隴西成紀人遷居高平柱國遠弟魏永熙中爲統軍孝武西遷授都督封永平縣子大統中進爵爲伯授武衛將軍儀同三司進封安武郡公加開府領侍中轉太僕進位大將軍

原州刺史遷雍州刺史兼小冢宰周初坐事除名尋除直州刺史武成中除少保拜小司徒進位柱國轉大司空天和中進封申國公建德初拜太保出爲原州總管進位上柱國轉并州總管大象初拜大左輔隋受禪拜太師開皇六年卒年七十七贈冀州刺史諡曰明

請移都表

帝王所居隨時興廢天道人事理有存焉始自三皇暨夫兩漢有一世而屢徙無革命而不遷曹馬同洛水之陽魏周共長安之內此之四代蓋聞之矣曹則三家鼎立馬則四海尋分有魏及周甫得平定事乃不暇非曰師古往者周運將窮禍生華裔廟堂冠帶屢覩茲同士有包藏人稀柱石四海萬國皆縱豺狼不叛不侵百城罕一伏惟陛下膺期誕聖秉籙受圖始晦君人之德俯從將相之重內翦羣兇崇朝大定外誅巨猾不日肅清變大亂之民成太

平之俗百靈符命兆庶謳歌幽顯樂推日月填積方屈箕穎之志
始順內外之請自受命神宗弘道設教陶冶與陰陽合德覆育共
天地齊旨萬物開闢之初八表光華之旦視聽日革風俗日移至
若帝室天居未議經邦非所謂發明大造光贊惟新自漢以來爲
喪亂之地爰從近代累葉所都未嘗謀邇問筮瞻星定鼎何日副
聖主之規表大隋之德竊曰神州之廣福地之多將爲皇家興廟
建寢上玄之意當別有之伏願遠順天人取決卜筮時改都邑光
宅區夏任子來之民垂無窮之業應神宮于辰極順和氣于天壤
理康物阜永隆長世臣日薄桑榆位高軒冕經邦論道自顧缺然
丹赤所懷無容喋嘿

隋書李
穆傳

遺令

吾荷國恩年宦已極啟足歸泉無所復恨竟不得陪玉鑾于岱宗
預金泥于梁甫眷眷光景其在斯乎

隋書李
穆傳

李詢

詢字孝詢，穆兄賢之子。仕周爲納言上士，轉內史上士，兼掌吏部。建德中，拜司衛上士，歷儀同三司、長安令，遷英果大夫，加位大將軍，封高平郡公。大象初，爲行軍元帥、長史，進位上柱國，改封隴西郡公。隋受禪，檢校襄州總管，尋拜隰州總管，卒，諡曰襄。上隋公密啟。

大將梁士彥，宇文忻、崔弘度，竝受尉遲迴饗金，軍中恠恠，人情大異。隋書李德林傳：韋孝寬爲東道元帥，長史李詢上密啟。

梁睿

睿字恃德，安定烏氏人。西魏大統中，襲父禦爵廣平郡公，累加儀同三司，尋爲本邑大中正。恭帝時，加開府，改封五龍郡公。周受禪，徵爲御伯，出爲中州刺史，鎮新安，拜大將軍，進封蔣國公，入爲司會，遷小冢宰。武帝時，歷敷州刺史、涼安二州總管，進位。

柱國大冢中爲益州總管進位上柱國隋受禪徵還京師開皇十五年卒諡曰襄大業中追改封戴公

上隋公疏請略定南寧

竊曰遠撫長駕王者令圖易俗移風有國恆典南寧州漢世牂柯之地近代已來分置興古雲南建寧朱提四郡戶口殷眾金寶富饒二河有駿馬明珠益寧出鹽井犀角晉太始七年曰益州曠遠分置寧州至僞梁南寧州刺史徐文盛被湘東徵赴荊州屬東夏尙阻未遑遠略土民蠻貊遂竊據一方國家遙授刺史其子震相承至今而震臣禮多虧貢賦不入每年奉獻不過數十匹馬其處去益路止一千朱提北境卽與戎州接界如聞彼人苦其苛政思被皇風伏爲大丞相匡贊聖朝寧濟區宇絕後光前方垂萬代闢土服遠今正其時幸因平蜀士眾不煩重興師旅押僚旣訖卽請略定南寧自虜戎已來軍糧須給過此卽于蠻夷徵稅曰供兵馬

其寧州朱提雲南西爨竝置總管州鎮計彼熟蠻租調足供城防
倉儲一則曰肅蠻夷二則裨益軍國今謹件南寧州郡縣及事意
如別有大都督杜神敬昔曾使彼具所諳練今并送往隋書梁
書傳
又請

竊曰柔遠能邇著自前經拓土開疆王者所務南寧州漢代牂柯
之郡其地沃壤多是漢人既饒寶物又出名馬今若往取仍置州
郡一則遠振威名二則有益軍國其處與交廣相接路乃非遙漢
代開此本爲討越之計伐陳之日復是一機曰此商量決謂須取

隋書梁書傳
書未答又詩

上書奏北邊鎮守策

竊曰戎狄作患其來久矣防遏之道自古爲難所曰周無上筭漢
收下策曰其條來忽往雲屯霧散疆則騁其犯塞弱又不可盡除
故也今皇祚肇興宇內寧一唯有突厥種類尙爲邊梗此臣所已

廢寢與食、寤寐思之、昔何奴未平、主公病辭老、先零尚在、充國自劾、臣才非古烈、而志追昔士、謹件安西北邊城鎮烽候及人馬糧貯戰守事意如別、謹并圖上呈、伏惟裁覽、隋書梁睿傳睿見突厥方隅思爲邊患復陳鎮守之策十餘事上書奏之

賀榮定

榮定扶風平陵人、尙文帝姊安成長公主、西魏大統中爲千牛備身、授平東將軍、封宜君縣子、拜上儀同、襲父善爵永富縣公、進位開府、除忠州刺史、周建德末、加上開府、拜前將軍、伏飛中大夫、大象中、領左右宮伯、拜洛州總管、隋受禪、坐事除名、尋拜右武侯大將軍、上柱國、宣州刺史、除秦州總管、進爵安豐郡公、拜右武衛大將軍、轉左武衛大將軍、開皇六年卒、贈冀州刺史、諡曰懿、

上書讓三公

臣每觀西朝衛霍東都梁鄧幸託葭華位極台鉉寵積驕盈必致傾覆向使前賢少自貶損遠避權勢推而不居則天命可保何覆宗之有臣每覽前修實爲畏懼

隋書賈榮定傳

趙嘏

嘏字圓通一作通賢天水西人魏末爲周文帝相府參軍封平定縣男轉中書侍郎周受禪遷陝州刺史授開府儀同三司遷荊州總管長史入爲民部中大夫建德中除益州總管長史入爲天官司會累遷御正上大夫大象中加上開府復拜天官都司會遷大宗伯隋受禪進大將軍封金城郡公出爲相州刺史徵尙書右僕射出爲陝州刺史轉冀州刺史

因斛斯徵在逃密奏周武帝大赦

徵自己負罪深重懼死遁逃若不北竄匈奴則南投吳越徵雖恐陋久歷清顯奔彼敵國無益聖朝今者炎旱爲災可因茲大赦

隋書

趙聖大傳

楊尙希

尙希

通典作士希

弘農人周文帝賜姓普六如氏擢爲國子博士轉

舍人仕明武世歷太學博士太子宮尹計部中大夫賜爵高都縣侯東京司憲中大夫大定中授司會中大夫隨受禪拜度支尙書進爵爲公出爲河南道行臺兵部尙書加銀青光祿大夫出爲瀛州刺史未之官除兵部尙書轉禮部尙書授上儀同出爲蒲州刺史開皇十年卒諡曰平

請併省郡縣表

自秦并天下罷侯置守漢魏及晉邦邑屢改竊見當今郡縣倍多于古或地無百里數縣並置或戶不滿千二郡分領具寮已眾資費日多吏卒又倍租調歲減清幹良才百分無一動須數萬如何可充所謂民少官多十羊九牧琴有更張之義瑟無膠柱之理今

存要去關併小爲大國家則不虧粟帛選舉則易得賢才敢陳管見伏聽裁處

隋書楊尙希傳北史七十五通典三十三

韋世康

世康京兆杜陵人魏雍州從事員子西魏大統中辟州主簿歷直寢封漢安縣公尙周文帝女襄樂公主授儀同三司後仕用歷典祠大夫沔硤二州刺史從武帝平齊授司州總管長史宣帝時入爲民部中大夫進位上開府轉司會中大夫靜帝卽位授絳州刺史隋初擢禮部尙書進爵上庸郡公轉吏部尙書拜襄州刺史免尋授安州總管遷信州總管復拜吏部尙書出爲荊州總管開皇十七年卒贈大將軍諡曰文

在絳州與子弟書

吾生因緒餘夙霑纓弁驅馳不已四紀于茲亟登衮命頻泣方岳志除三惑心愼四知已不貪而爲寶處膏脂而莫潤如斯之事頗

爲時悉今耄雖未及壯年已謝霜早梧楸風先蒲柳眼間更劇不見細書足病彌增非可趨走祿豈須多防滿則退年不待暮有疾便辭況孌春秋已高溫清宜奉晨昏有闕罪在我躬今世穆世文竝從戎役吾與世冲復嬰遠任陟岵瞻望此情彌切桓山之悲倍深常戀意欲上聞乞遵養禮未訪汝等故遣此及輿言遠慕感咽難勝

隋書韋世康傳

王元規

元規字正範太原晉陽人居會稽師事沈文阿梁中大通初對策舉高第爲湘東王國左常侍轉員外散騎侍郎除中軍宣城王記室參軍侯景之亂棄官歸鄉里陳天嘉中除始興王功曹參軍領國子助教轉鎮東鄱陽王記室參軍仍領助教後主在東宮引爲學士尋除尚書祠部郎復爲鄱陽王中錄事參軍轉散騎侍郎遷南平王限內參軍王爲江州隨府之鎮陳亡入隋

爲秦王府東閤祭酒卒于廣陵年七十四有續沈文阿春秋左氏傳義略十卷續經典大義十二卷

郊壇丈尺議

案前漢黃圖上帝壇徑五丈高九尺后土壇方五丈高六尺梁南郊壇上徑十一丈下徑十八丈高二丈七尺北郊壇上方十丈下方十二丈高一丈卽日南郊壇廣十丈高二丈二尺五寸北郊壇廣九丈三尺高一丈五寸今議增南郊壇上徑十二丈則天大數下徑十八丈取于三分益一高二丈七尺取三倍九尺之堂北郊壇壇上方十丈目則地義下至十五丈亦取二分益一高一丈二尺亦取二倍漢家之數禮記云爲高必因丘陵爲下必因川澤因名山升中于天因吉土饗帝于郊周官云冬日至祠天于地上之圜丘夏日至祭地于澤中之方丘祭法云燔柴于泰壇祭天也瘞埋于泰圻祭地也記云至敬不壇埽地而祭于其質也目報覆燾持

車之功爾雅亦云丘言非人所造爲古園方兩丘竝因見有而祭
本無高廣之數後世隨事遷都而建立郊禮或有地吉而未必有
丘或有見丘而不必廣絜故有築建之法而制丈尺之儀愚謂郊
祀事重園方二丘高下廣狹旣無明文但五帝不相沿三王不相
襲今謹述漢梁丘卽日三代壇不同及更增修丈尺如前聽旨禮儀志一太建十一年尙書祠部郎王元規議詔遂依周又略見通典四十二

賜進士出身二品銜廣東等處提刑按察使司按察使兼管驛傳事務黃岡王毓藻校刊

全隋文卷九終

全隋文卷九

王元規

十二

全隋文卷十

烏程嚴可均校輯

江總一

總字總持，濟陽考城人。晉散騎常侍統十世孫。梁大同中，爲宣惠武陵王法曹參軍。歷何敬容、丹陽尹、佐史、除主簿，遷尚書殿中郎，轉侍郎，進太子洗馬，出爲臨安令，還爲中軍宣城王錄事參軍，轉太子中舍人。太清中，兼太常卿。臺城陷，避難會稽，尋依蕭勃于廣州。承聖中，徵爲明威將軍，始興內史，未行而江陵陷。陳天嘉中，徵還爲中書侍郎、直侍中省。太建中，遷司徒右長史，掌東宮管記給事，黃門侍郎，領南徐州。大中正，授太子中庶子，通直散騎常侍，遷左民尚書，轉太子詹事，免。尋爲侍中，領左驍騎將軍，免。尋爲散騎常侍、明烈將軍、司徒左長史，遷太常卿。後主卽位，除祠部尚書，轉吏部尚書，遷尚書僕射，尋加宣惠將軍。

授尚書令、順明中進號中權將軍、陳亡入隋、爲上開府、開皇十四年卒于江都、年七十六、有集三十卷、後集二卷、

貞女峽賦

倦辛苦于嶺表、遂沈淪于海外、迹飄飄于轉蓬、情繚繞于懸旆、駭茲峽之珍怪、佇奇峯而隴隴、或邈迤而四成、乍罪鬼而五曲、含照曜之燭銀、滄游浚之膏玉、山蒼蒼曰墜葉、樹索索而搖枝、澄碧源之見底、聳翠壁曰臨危、類文類聚六

脩心賦 并序

大清四年秋七月、避地于會稽龍華寺、此伽藍者、余六世祖宋尚書右僕射州陵侯元嘉二十四年之所構也、侯之王父晉護軍將軍彪、昔流此邦、卜居山陰都陽里、貽厥子孫、有終焉之志、寺域則宅之舊基、左江右湖、面山背壑、東西陵跨、南北紆縈、聊與苦節名僧、同銷日月、曉修經戒、夕覽圖書、寢處風雲、憑樓水月、不意華戎

莫辨朝市傾淪。曰此傷情。情可知矣。噉泣濡翰。豈摠鬱結。庶後生
君子憫余此槩焉。

嘉南斗之分次。壁東越之靈臚。表憎風于韓什。著鎮山于周紀。續
大禹之金書。鐫暴秦之石字。太史來而採穴。鍾離去而開筭。信竹
箭之爲珍。何砭砭之罕值。奉盛德之鴻祀。寓安禪之古寺。實像章
之舊圖。成黃金之勝地。遂寂默之幽心。若鏡心而遠尋。面曾阜之
超忽。邇平湖之迴深。山條偃蹇。水葉浸淫。挂猿朝落。飢鼯夜吟。果
叢藥苑。桃蹊橘林。稍雲拂日。結暗生陰。保自然之雅趣。鄙人閒之
荒雜。望島嶼之邇邇。面江源之重沓。泛流月之夜迴。曳光煙之曉
市。風引蜩而嘶噪。雨鳴林而脩颯。烏稍狎而知來。雲無情而自合。
邇邇野閒。靈塔地築。禪居喜園。迢遞樂樹扶疏。經行藉草。宴坐臨
渠。持戒振錫。庇影甘蔬。堅固之林可喻。寂滅之場暫如。異曲終而
悲起。非木落而愁如。豈降志而辱身。不露才而揚己。鍾風雨之掩

諷倦鷄鳴之聒耳幸避地而高棲憑調御之遺旨折四辯之微言
悟三乘之妙理遣十纏之繫縛祛五惑之塵滓久遺榮于勢利庶
忘累于妻子惑意氣于疇日寄知音于來祀何遠客之可悲私自
憐其何已

陳書江總傳文苑英華九十七

勞酒賦

在陽春之仲序覽具物之芳菲帥公卿而播百穀親耒耜而命三
推開青壇于迴甸列翠幕于清沂乃遵執爵之典爰降食苹之譟
豁朱鳥之高牕啓黃龍之抗殿奏帝鴻之萬舞動鈞天之九變顧
曲私之亭育遞寒暑而徂遷謬陳力而策駘豈酬恩于暮年

三十

辭行李賦

惟大梁三十有六載神功懋乎開闢垂恩儲祉歷子代之盤盂盛
德形容陋周年之弁石月窟向風日域仰澤要荒款塞諸戎重譯

輶軒巡履聲芳亥步旌節經過事高禹迹舉皇華之盡美馳珥玉
之多事或江夏之無雙正洛陽之才子訪羽儀于廊廟旌秀異于
杞梓引強學之三端賞雕文于四始顧德侔于罕志奉朝章于信
次忝鳳舉而張旗濟龍沙而通書敬異季札之聽歌譽垂屬國之
銜使懷蘇子之抵掌憶千秋之畫地願自勵而飲水揆无庸而案
轡嗟負恩之无力每若寘于藜棘候辭東平之樂善再踐承明而
遊息豈羨千里之奔蹏靈殊一錢之不直諒无期于鴻漸念有似
于蟬翼荷德澤之濡然墜丹愚之匪飾暫借譽于瑟柱免長徭于
蔥極聊暇日已須臾每長吟已鬱紆異金石之能固若草木之分
區進學慙于枝葉綿力謝于康衢構伯休之蓬戶狎仲憲之桑樞
徒悅水而非智庶因谷已爲愚恥矯名于周客靈監響于齊竿奉
棲遲已偃仰願太素之不汚

初學記
二十

覽黃圖之棟宇規紫宸于太清何面勢之膠葛信不日之經營仰
一時之壯麗跨萬古之威靈吐燭石之奇色混高堂之舊名若乃
三階八戶百拱千楹瑩曰玉琇飾曰金英綠芰懸插紅渠倒生于
時木葉聲寒壺人唱靜承露擎虛相風昭迴天子乃下盤開宴出
豫娛神文懸日月思革風塵實附鳳之多幸愧屠龍之不真

六十

華貂賦并序

領軍新安殿下曰副貂垂錫仰銘恩澤謹題小賦

貴豐貂于挹婁飾惠文而見求標侍臣之密設曜毛彩之溫柔拜
文機而影度陪武帳而香浮隨玉珩之近遠共金璫之去留仰太
山之千仞開谷中之鄙矣撤君子之寶飾榮小人之蓬蒿蔑置醴
之殊私誇賜田之薄潤顧朽拙之微躬早遊藝而不工逢河閔之
好古自愧始而恩隆諒維鵜之有媿庶懷昔而克終

藏文類聚
六十七

山水納袍賦并序

皇儲監國、餘辰勞謙、終宴有令、已納袍降賜、何已奉揚恩德、因題此賦、

濫時來之寵沐、振長纓、已祇肅奉性與之文章、侍相娛之絲竹、解女羅之山帶、佩流霞之羽服、裁縫則萬壑縈體、針縷則千巖映目、圖島嶼之削成、寫淪漣之徑復、埒符彩于雕煥、竝芬芳于蘭菊、憫四選之徂遷、軫百慮之迴遘、霜飛空而浸霧、雁照月而猜弦、聽風鍾之易近、對水雷之疏懸、若董衣之百結、同衛服之十年、嗟班鬢之已颯、愧冶袖之爲妍、謝銜珠之有報、荷墜履之無捐、裁文類聚六十七

瑪腦盤賦

翠羽流霞之杯、諒無聞于瑋麗、豈匹此之奇瑰、爰覩殊特、臻自西國、狀驚鶴之點漬、似遊龍之割刻、土衡譬之雲采、中郎羞其馬勒、于時北園清夏、東閣浮涼、山交枝而影雜、水沈葉而流香、蟬無風

而引短鷺出迥而飛長副君海亭岳峙紙落金鏘獲阿宗之美寶
命河朔之名觴寶出崑崙之仙阜觴卽元洲之玉酒酒旣醉而還
年盤稍酌而延壽仰天縱之體物銘欵器今何有載文類聚
七十三

南越木樨賦

日及多名製賓肇生東方記平夕死郭璞贊曰朝榮潘文體其夏
盛嵇賦憫其秋零此則京華之麗木非於越之舜英南中斬草眾
花之寶雅什未名騷人失藻雨來翠潤露歇紅燥疊萼疑繁低華
若側朝霞映日殊未妍珊瑚照水定非鮮千葉芙蓉詎相似百枝
燈花復羞燃慙欲寄根對滄海大願移華廁綺錢井上桃蠟難可
雜庭中桂蠹豈見憐乃爲歌曰啼妝梁燕婦紅妝蕩子家若持花
竝笑宜笑不勝花趙女垂金珥燕姬插寶珰誰知紅樨豔無因寄
狹邪徒令萬里道攀折自咨嗟藝文類聚
八十九

舉士詔

至德四年正月甲寅

堯施諫鼓禹拜昌言求之異等久著前冊舉自滯淹復聞昔典斯
乃治道之深規帝王之切務朕自寡昧不承洪緒未明虛已日昨
興懷萬機多紊四聰弗達思開謇諤採其默語王公曰下各薦所
知僞詢管庫爰及輿阜一介有能片言可用朕親加聽覽佇茲啟
沃

藝文類聚五十三又見初學記二十陳書後
主紀前冊作前徽默語作謀計佇茲作佇于

爲陳後主在東宮臨學聽講令

令中庶子膠庠化本教學政前古之雍熙寧不由是自炎行將季
風化陵遲梁室版蕩微言中廢後生莫曉洙泗之文晚學未聞齊
魯之說加已棄本逐末情多詭競自衒守廬更如膠柱假詞而誦
豈類背碑吾稟訓晨昏言詩立禮溫清暇日秋籥冬書翫前聖之
簡牘慕往賢之砥礪今鋒刃既銷雍序大啟剛浮去僞求名責實
備立總集蒲玉交馳楨幹懿親開蒙範物梁園魯殿崇經弘道泮
宮藩學未比宗師小山騁什寧同章句可謂千里更齊知十肅奉

越過預觀訓胄、縫掖濟濟、冠冕師師、聽鈎深之說、囑循還之辯、美業再興、于斯爲盛、昔遁棲下、睥向加束帛、祥瑞上臻、猶班重幣、況茲大禮、而可忽諸、外卽詳賜學僚、已稱吾意、文館詞林

爲陳六宮謝章

恭膺禮命、愧集丹縷之顏、拜奉曲私、愁繁翬羽之色、魯宮夜火、怕媛匪驚、楚榭存禱、貞姜何懼、豈期日月騰影、風雲寫潤、遲復位崇、九御聲高、六列象服、增華丹戟、耀采何已、弼佐王風、克柔陰化、兢懼竝集、追想流衍之詩、荷遠相并、遂失鳴環之節、藝文類聚十五初學記十

爲陳六宮謝表

鶴籥晨啟、雀釵曉暎、恭承盛典、肅荷徽章、步動雲桂、香飄霧縠、婉綈豔粉、無情拂鏡、愁縈巧黛、息意臨牕、妾聞漢水贈珠、人間絕世、洛川拾翠、仙處無雙、或有風流行雨、窈窕初口、聲高一笑、傾起兩環、乃可桂殿迎春、蘭房侍寵、借班姬之扇、未掩驚羞、假蔡琰之文、

宣披懷戴

藝文類聚十五

讓吏部尚書表

竊以漢置五曹、方今六尚、魏隆八凱、擬古六卿、近喻喉舌、遠譬樞
斗、至如東京許郭、西晉裴王、仰首仲眉、可得而論列矣、但臣門基
世緒、晉宋已來、內侍帷扈、入尸衡尺、或年甫將立、或歲未強仕、是
已退思弱冠、迫傷疇昔、早塵華任、見知名輩、常謂忝竊匪朝、伊夕
豈期梁室多故、有志無時、平生意氣、颯爾零落、特由邀奉嘉運、千
載一時、惟奮寵靈、遂臻于此、藝文類聚四十八初學記十一
爲沈尚書君理讓右僕射領吏部表

辛香已來、安石已後、遵其軌躅、必大厦之棟梁、總其寄任、亦巨川
之舟楫、未有綿力薄材、輕膺此舉、藝文類聚四十八

讓尚書僕射表

藻鏡官方、品裁人物、門驚如市、不慚屋漏、心抱如冰、無欺暗室、但

屢淹星鳥、每知忝素世網拘束、事歸僂勉、今此召會、尤增據疾、竊
曰端揆副職、官稱師長、革履升降、傳呼寵赫、儀刑朝首、冠冕彝倫、
兼復參摠衡流、匡佐聖治、安膺重責、必踐危機、藝文類聚四十八
初學記十一星鳥

作星鳥危
機作棟橈

讓尚書令表

臣弱歲立朝、本無奇志、每謂任登常伯、足承基緒、值梁季不造、牧
拙人間、東甌三江、南徂百越、不知秦漢、十有七年、心迹退黜、平生
畢矣、但性疏懶、不屑死墮、俯仰乖時、人物多忤、天飛踐祚、任寄隆
重、謬呂商丘之本、遂比舟楫之材、燕岱之丘、混同瑚璉之器、當由
崇賢使舉、早守名節、竊曰天府文昌、萬方之藪、天官冢宰、無所不
統、禮革三獨、事昭百揆、曠職云久、三十餘載、一旦開置、必資望實、
豈期廷典私偏、濫庸菲薄、陛下聽覽餘辰、曲垂昭納、遂斯反託、高
選具瞻、則敝蓋敝帷、使臣暮齒、歲制月制、賒臣皓髮、不日一息、文苑

類聚四十八

爲衡陽王讓吳郡表

之泥馳印發命開函穎之誠夏霜易霜兢惶之至春冰可涉臨輜

回軾卽事何取廣川無聲頗知自匹

欽文類聚五十

謝敕給鼓吹表

略尋近古逖聽前事王文憲匡佐革命沈隱侯經綸始運騎吹之

榮猶難忝冒已臣況此實非倫輩豈可更崇文物重假名器高臺

迢遞未朱夏而登臨芳樹華滋非青春而奏曲

藝文類聚六十人

爲太保蕭公謝儀同表

阪泉野戰曾無汗馬之勞代邸運籌又闕前驅之勇薄代專征早

遊邊外執玉奉酎文虧朝則王人降止朝冊遠臨奉述敕書曲停

表奏滄波阻負旣杜敬仲之辭關路悠長致絕趙衰之讓心馳紫

路登文石而莫由目送白雲拜承明而未日

藝文類聚四十七御覽二百四十三

除詹事謝宮啟

庇身修德、濫迹端形、陳蘿故葛、攀附不涯、解角蛻鱗、超踰非次、方
辭璽會、覲收渥澤、數文類聚四十九

謝宮爲製讓詹事表啟

如攀珠樹、徒仰照匣之輝、若踐玉田、不知照廡之價、芙蓉之水、亟
奉北園、迷迭之文、屬陪南館、久降嘘枯之旨、許賜凌雲之筆、清夜
譙斯、謂言善戲、黃金然諾、竝遂殊寵、年齊柏寢、豈報恩榮、紙整蘭
臺、未書棟戴、數文類聚四十九

除尙書令謝璽啟

竊曰昔之冢司、今日端揆、頃同臺衮、無人則闕、臣之朽薄、安可叨
賁、謹當奏承夜月、冀奉三思之旨、聲寄浮雲、方祈九天之路、

除尙書令斷表後啟

司會治本、永宰朝端、指紳所屬、儀刑攸在、皇代已來、無人則闕、陛

下將備厥職、用穆臣僚、不容始自庸菲、曰、謹物議、當今蒲翰至戚、不無其才、廊廟重臣、亦有其器、伏願檢俞往之則、闢平章之道、臣公心布款、有理存焉、

款文類聚四十八初學記十一

上毛龜啟

臣聞聖王受命、臣代紹興、日月精明之狀、煙雲爛漫之采、神鼎出于汾陰、寶玉開于張掖、靈山奧澤、卉木呈祉、靜海澄波、鱗介禔福、靡不顯符瑞、曰、固鴻基、肇徵祥、曰、光永世者也、影合四靈、光分五色、懷星拖月、負宇銜圖、

款文類聚九十九

陶貞白先生集序

昔劉向通古今之學、馬融見天下之書、京房察風雨之占、裴楷曉陰陽之術、子政傷于飭易、季長傲于驕侈、君明遂不旋踵、公矩纔免極誅、鮮有盡美之迹、罕聞克終之譽、若夫德行博敏、孔室四科、經術深長、鄭門六藝、丹陽陶先生備斯矣、至如紫臺青簡、綠帙丹

經玉版祕文瑤壇怪牒靡不貫彼精微殫其旨趣蓋非常之絕伎
命世之異人焉文集缺亡未有編錄門人補輯若逢遼東之本好事
妍搜如誦河西之篋奉敕校之鈐墨緘已緹緗藏彼鴻都副在
延閣裁文類聚
五十五

入攝山棲霞寺詩序

壬寅年十月十八日入攝山棲霞寺登岸極峭頗暢懷抱至德元
年癸卯十月二十六日又再遊此寺布法師施菩薩戒甲辰年十
月二十五日奉送金像還山限呂時務不得恣情淹留乙巳年十
一月十六日更獲拜禮仍停中山宿永夜畱連棲神悚聽但交臂
不停薪指俄謝率製此篇呂記歲月俾後來賞者知余山志
廣弘明集
三十

遊攝山棲霞寺詩序

禎明元年太歲丁未四月十九日癸亥入攝山展慧布法師憶謝

靈運集還故山入石壁中尋鬬隆道人詩一首十一韻今此拙
作仍學康樂之體廣弘明集
三十一上

自叙

歷升清顯、備位朝列、不邀世利、不涉權幸、嘗撫躬仰天太息曰、莊
青翟位至丞相、無迹可紀、趙元叔爲上計吏、光乎列傳、官陳已來、
未嘗逢迎一物、干預一事、悠悠風塵、流俗之士、頗致怨憤、榮枯寵
辱、不日介意、太建之世、權移羣小、諂嫉作威、屢被摧黜、柰何命也、
後主昔在東朝、留意文藝、夙荷昭晉、恩紀契闊、嗣位之日、時寄謬
隆、儀形天府、釐正庶績、八法八典、無所不統、昔晉武帝策荀公曾
曰、周之冢宰、今之尙書令也、況復才未半古、尸素若茲、晉太尉陸
玩云、呂我爲三公、知天下無人矣、軒冕儻來之一物、豈是預要乎、
弱歲歸心釋教、年二十餘、入鍾山、就靈曜寺、則法師受菩薩戒、暮
闔官陳、與攝山布上人遊款、深悟苦空、更復練戒、運善于心、行茲

于物頗知自歟而不能蔬菲尙染塵勞曰此負愧平生耳

陳書江總傳總

管自敘其略云云
時人謂之賁錄

賜進士出身二品銜廣東等處提刑按察使司按察使兼管驛傳事務黃岡王毓藻校刊

全隋文卷十一

烏程嚴可均校輯

江總二

莊周畫頌

玉潔蒙縣蘭薰漆園丹青可久雅道斯存夢中化蝶水外翔鯉出
俗靈府師心妙門垂竿自若重聘忘言悠哉天地共是籠樊類聚

三十

香贊

海岸相傳香流大千不吹自轉將銷更燃縈空雜霧散迴飛煙還
符戒品熏修福田

花贊

池中寶花葉覆金沙逆風氣亂映水光斜散由天女賣乃王家若
生心樹願結因牙

燈贊

寶燈夜開影徧花臺烟抽細燄燼落輕灰珠慙色竝月恥光來一
明暗室若遺塵埃

幡贊

金幡化成搖蕩相明爾無定影散乃俱輕光分紺殿采布香城恆
知自轉福與之生

藝文類聚
七十六

芳林園天淵池銘

歲次執徐月維大呂爰命梓匠廣修舂鍤標置舊趾開浚昔基東
西彌望雲霧之所澄蕩南北紆榮虹霓之所引曜曉川漾璧似日
御之在河宿夜浪浮金疑月輪之馳水府前瞰萬雉列榭參差卻
拒三襲危巒聳峭環鳥異禽自學歌舞神木靈卉不知搖落但叔
皮覽海序螭蛟之泛濫吉甫臨舟美檉松之蓊茸尙復著在吟詠
緘彼緹緇況我君門盛事未紀謬頒待詔謹製銘云

石溝澗密、蘭渚潮平、九華問道、百丈層盈、液搖殿色、殿寫波明、文類聚

永陽王齋後山亭銘

叢臺造日、淄館連雲、錦牆列績、繡地成文、吾王卓爾、逸趣不羣、梅梁蔥閣、桂棟蘭粉、竹深蓋雨、石暗迎暝、激流疑疏、搆峰似削、苔滑危磴、藤攀聳萼、樹影搖窗、池光動幕、月澄遙激、風清近壑、雪岸難消、花園易落、高桐百尺、垂楊五株、開榮九畹、結秀三珠、山條紫的水葉紅鬚、抽芳繞雷、接翠分衢、亭謹旅鶴、浦噪驚鳧、前列牧馬、後招郇伯、諷誦楚詩、精微沛易、叢桂畱賞、散金匪惜、不羨睢陽、還嗤碣石、馳聲終古、服義無讎、蘇文類聚六十四

玄圃石室銘

僊巖石楡、僊宇石牆、地云正域、道示修羊、紫烟碧露、絳雪玄霜、廣成不踐、王烈未珵、移華甲觀、徙構震方、遠跨飛梁、俛臨倒景、瓊蕊

珠樹金階玉井映日分暉搖風共影岫濃翠合林虛桂靜朔去偷
桃董來貨杏檐非刻削戶恣登臨迎春花近避暑涼深秋雲卷閣
冬霰停陰桐樓鳳采竹化龍吟輕飛亂色激溜成音天縱儲睿生
知作兩弦誦餘隙仁智爲賞何曲停遊洛濱息往祥梨吐秀瑞燕
流響一物或鐫萬國斯仰藝文類聚六十五

方鏡銘

并序

此鏡日照著衣鏡背圖刻八卦二十八宿仁壽殿前無呂加斯彫
麗也

玄栲命巧仲呂呈祥金鑄石漢銅鑄丹陽價珍負局影麗高堂圖
星擬蓋爲卦隨方明濟水止照與天長增輝兔苑永侍龍光藝文類聚

十七

懷安寺剎下銘

四聰睿后萬行了因邇先玉鏡道茂金輪爰構靈剎地迹重闔迎

風雲表承露天津飛蓋嶺嶺累棟嶙峋護持七眾警衛百神籌銷
草木劫盡沙塵支提永固福業恆新變易東海長久北辰

銘

晁氏之匠狴陽之銅圖樂鐫鐫刻獸鐫蟲聲飛雪裏韻切屑中造
符玉律遠雜金風朝驚驚嶺夜動龍宮翼憑慧業冥感神功百非
洗蕩萬善相通長如五淨永證三空

又鐘銘

篆閒鐫刻樂上雕鐫聲齊法鼓響逸鳴健舟移巨壑火壞初禪
優填像銘

如花譬象若火疑龍毫光此遇法相今逢眸雲齒雪月貌金容大
仙下降避席爲恭

蘇文類聚
七十七

梁故度支尚書陸君誄

君諱襄字師卿吳人也祖惠徹宋車騎府法曹行參軍父閑揚州

別駕齊永元紹祿蕭遙光謀反伏誅開昌州職見害子絳其日并
命忠孝之道萃此一門襄時年十四號毀殆滅布衣蔬食終于身
世起家著作佐郎出爲永寧縣令累遷臨川王廬陵王法曹外兵
記室入爲太子洗馬掌管記中書舍人管記如故爲丹陽尹丞俄
遷太子庶子掌管記揚州治中太子家令領國子博士管記如故
丁母顧夫人憂廬平墓所服闋又從家令轉中庶子並掌管記遷
中散大夫金華宮家令出爲鄱陽內史除尚書吏部郎祕書監領
揚州大中正度支尚書太清二年三月京師傾覆君竄迹還鄉吳
民陸黯起義民攻郡擾攘之際愛憤而終春秋七十有二余避世
河滌暫之吳國百舍不容千里無饋陸公國士之眷惠好之深朝
同俯甌夕共瓢飲契闊晤言流連晦朔日月逝矣懷古何忘臨哀
能諫久願搖筆時事屯迫不遑削藁梁季適越未戢干戈陳世入
仕累牽物役忤軸于懷四十餘載隋開皇九年于長安致仕懸車

已泊就木幾何、但東海成田、南冠永繫、龜山更促、空想吹笛之哀、
馬角徒生、絕望通波之水、嗚呼哀哉、攬涕操觚、乃爲詩曰、

嬌苗碩茂、完裔繁昌、賓門穆穆、宦仕鏘鏘、食采命氏、遐哉陸鄉、四
昇臺省、八辟賢良、分柯振葉、令聞令望、玄凝朱輿、翠弁金鎗、流聲
世祀、列讚祠堂、別駕貞烈、志存名教、捐生徇主、知死不撓、暉映泉
壤、痛此忠孝、於鑠夫子、積德累仁、韶光戢耀、隱璞含真、居哀能痛、
至情通神、淚枯壠樹、哀感馴禽、永慟家禍、長號不辰、玄黃絕睇、蔬
布終身、心符屈姪、室等原貧、分甘共感、內族外姻、求之今古、斯爲
異人、月下奏章、螢前讀史、給紙蘭臺、觀書洛市、強學待問、潤身爲
己、結髮濯纓、登朝入仕、昂昂逸驥、逐日千里、宛宛長離、陵江迅起、
枳棘棲鳳、化行乳雉、平臺累陟、石扇躔履、跼伏不競、芬絲自理、倚
席無譏、師訓胄子、驥足時務、俊民斯俟、秋實選能、春華備美、思媚
儲后、遊息承華、書記策擢、爵命增加、彈碁擊筑、沈李浮瓜、追隨飛

蓋侍從鳴笳、二儀迴幹、四氣淹賒、離景遽沈、前星奄滅、撫己惟舊、
懷恩守節、昔荷故臣、攀號聲折、登高能賦、大夫就列、金華式肇、更
奉清切、脩竹貞松、含霜抱雪、下車軒日、求瘼康時、良辰坐嘯、朗夜
臥治、懸魚化靜、佩犢去思、廣弘條教、精察毫釐、典選搜揚、操刀密
勿、不素朱紫、傍無請謁、祕署學林、得人超忽、延閣細素、校文遺闕、
上妙鉛槧、譽成著月、雁行攸序、龍作簡木、讓珠不拜、賜劍恩來、帝
曰俞往、爾行兼該、金城失險、玉帛流災、年臻几杖、病息草萊、世故
天禍、臣悲主辱、露盡朝陽、風驚夜燭、黃鵠超遙、白駒何促、事迫歸
魂、依然啟足、悠悠世路、辛苦艱虞、尋戈滿道、暴骨交衢、家無半菽、
地絕飛芻、念君桑梓、零落凋枯、傷君井邑、子盤嶠嶠、喪亂絕上、葵
藿荒蕪、淒涼故友、擗標遺孤、臨穴外野、撫榦窮途、嗚呼哀哉、爲善
豈懼、修名難假、德履中和、道周文雅、不朽之迹、非謂泉下、聲聲清
名、泠泠獨寫、嗚呼哀哉、

文苑英華八百四十二又
略見魏文類聚四十八

陳宣帝哀策文

望蜃綽而攀標、拜龍菰而慟絕、變五統而淒涼、迴三辰而慘切、感川岳而地維傾、號穹蒼而天柱折、千秋茂德、萬世鴻名、爰詔掌禮、式序英聲、其辭曰、

媽水樞宿、姚墟大虹、謳歌承歷、揖讓受終、重規帝緒、踵武王風、名山紀述、清廟傳功、我后丕承、思弘祖業、莅政恭己、臨朝凝默、煥爛九功、歲稔七德、憲章昭著、威靈允塞、爰茲發迹、天步艱難、連華滕衛、比譽應韓、羽儀咸右、軒冕朝端、祈禱當堅、繇顯大橫、延喜授玉、告善飛旌、神器有奉、性道無名、詩頌唐年、樂舞姬日、仁聲汪濊、武義洋溢、理訟總街、凝情衢室、巡望如禮、幽祇咸秩、疆垂叛叛、闕微虔劉、治兵丹浦、獲醜青丘、屠釣且拔、管庫方搜、如龍駕鼓、獻雉焚裘、天必呈祥、地宜愛寶、神禽奇獸、嘉穀靈草、屈軼抽階、飛黃伏皂、綺雲舒慶、珠星照老、廣敷丘素、弘啟膠庠、書林吐馥、文囿含鏘、南

浴侯衛北陽遐荒股羅自解周圍無傷金英掩色玉牀弗豫天駟
摧鑣王良失御鑄鼎奚益綴衣何處漫漫幽夜冥冥上仙長違拜
日天意祈年靈神卜兆晏駕迴天銅駝感泣銀海埋田出德陽之
廣殿動繁筵之哀嘯渡洛水之浮橋望偃師之近縣背紫陌而未
遠隱黃山而不見鐸敗挽而依依馬嘶風而戀戀平原欲晦落照
將垂鳳蓋飄而水暗鸞蹕聳而山危曳虵旗之舒卷閉翠野之參
差鳥哀哀而驚曙松瑟瑟而吟枝異故鄉之絲竹非舊宅之塤箎
埽秋葉而無盡薦春櫻而願知北邙已謝西陵何有遠宿蒼梧便
乖仁壽聲合韶濩道宣戶牖共瀛海而恆流竝嵩華而莫朽

載文
類聚

廣州刺史歐陽頤墓誌

天嘉四年

公家習尚書少府孺高于漢冊世居渤海太守文重乎晉原中原
喪亂避地南徙公孝敬純深友悌敦睦家積遺財竝讓諸季兼賜

同壤公含章內映遠識流通室嘗欲謹言行資貞幹事廉隅梁室
不造凶羯惡陵公被銳執兇有志匡復梁孝元帝授散騎常侍東
衡州刺史始興縣侯而大戎弑逆宗社播遷陳篡揖讓攸歸高祖
恩加惟舊授使持節都督南衡二十二州諸軍事廣州刺史進爲
開府儀同三司山陽郡公進號征南將軍加鼓吹一部巫山遠曲
喧騎吹于日南芳樹清音肅軍容于海截追贈車騎將軍司空公
涉獵六經優游百氏寬徭省賦化百越之歸心撫寒投醪感三軍
之死力在室如賓寧慚屋漏不貪爲寶每要人知殺青無兼兩之
疑慧以豈懷珠之諫如羊如粟不改夷齊之心遺慶遺風方留豹
產之德

藝文類聚五十

故侍中沈欽墓誌

太建元年

早結南陽之親致興沛市之役四埏多難三江屢梗君敦信化已
勵澆風庶滌清流日蕩閭俗早遣紫雲萍蒲碧海奮里閭之寵躍

車馬之貴。啗寶氏之青山。恥郭家之金穴。

載文類聚四十八

待進光祿大夫徐陵墓誌銘

至德元年

耕耜書圃。弋獵文場。藻思綺合。尺牘繡揚。辭奪太史。筆利干將。心
緘武庫。口定雌黃。奉使巡探。絕域遐深。市朝遷貿。陵谷相侵。形寄
玉績。多宣攀附。高排閭閻。鬱轉雲路。年踰致仕。齒及懸車。夜漏方
盡。馳光復斜。平原出宿。庠序爲家。隴愁宿霧。松悲閒鳥。地迴雲低。
山重樹小。九原孤月。三泉送旒。疇曩行役。共上河梁。余因病免。君
事遠將。痛心期之徂謝。憫時代之銷亡。冀鐫石于玄冢。畱清風于
故鄉。

載文類聚四十七

司農陳暄墓誌銘

其文猷猷。其筆縱橫。背碑卽誦。據馬俄成。誹諧見賞。調笑忘情。兩
宮寵宦。四主恩榮。萬事依息。一朝追送。疇昔命觴。文可吟詠。今日

醉酒長悲且慟。

載文類聚四十九

侍中中領軍魯廣達墓銘

開皇十九年

災流淮海、險失金湯、時屯運、代革天亡、爪牙背義、介冑無良、獨
標忠勇、率禦有方、誠貫皎日、氣勵嚴霜、懷恩感報、撫事何忘

陳書魯廣達

傳

皇太子太學講碑

我大陳之御天下也、若水渙其長瀾、瑞星踵其永厓、重華誕育、興
于大鹿之野、敬仲繼業、盛矣鳴鳳之占、兼曰鴻才海富、逸思泉湧、
含毫落紙、動八閩之歌謠、隻句片言、諧五聲之節奏、雲飛風起、追
歷漢帝之辭、高觀華池、遠跨魏皇之什、爰復建藏書之冊、開獻書
之路、帷帳叢殘、冢壁遺逸、紫臺祕典、綠帙奇文、羽陵舊迹、嵩山落
簡、外史所掌、廣內所司、靡不飾以鉛槧、彫以緗素、此文教之脩也

藝文類聚五十五
初學記二十一

吳興郡廬陵王德政碑

卓爾吾王、天人可擬、早成夙智、謙懷虛已、偃息流略、翱翔文史、三
雍雅對、九師名理、好古如斯、學兼之矣、睢陽肇構、碣石初開、賜田
待士、賜道求材、剖符彭蠡、述職琅臺、去謠曙鼓、留歌暮來、藏文類
聚五十

明慶寺尙禪師碑

百世之上、百世之下、含章隱璞、明真照假、空行已無、希音和寡、不
有耆德、誰其繼者、朗月靈懸、高風獨寫、藏文類
聚七十六

建初寺瓊法師碑

夫智慧精進、皆曰第一、妙德淨名、竝稱不二、若乃幹五欲之泥、解
六情之緼、禦寶車之迹、面香城之路、荷持像法、汲引人倫、惟此法
師、心力備矣、東山北山之部、貫花散花之句、竝編栴成、隨題蒲就
業、學非全朔、無待冬書、師夢升儒、自知秋駕、銘曰、

屑屑人世、茫茫大千、欲流心火、意樹身田、老驚靈籟、孔惜逝川、三

空莫辨、一語何詮。佛日初照、慈雲不偏。秋露寂滅、莫繫悠然。蘇文

攝山棲霞寺碑

蓋聞天有神宮、地云靈府。桑欽博記、始敘四衢之塔。金闕著經、因知千步之寺。至如峰形飢累、岫勢堂密。亦烏足言哉。南徐州琅邪郡江乘縣界有攝山者、其狀倂繖、亦名繖山。尹先生記曰、山多草藥、可已攝養、故曰攝爲名焉。南瞻舊落、願梯鎮成之場。北望荒村、扈謙卜筮之宅。此山西南隅、有外道館地。俄而疫癘磨滅、三清遺法、未明五怖之災。萬善開宗、遂變四禪之境。倏見齊居士平原明僧紹、空解淵深、至理高妙。遺榮軒冕、遁迹巖穴。宋泰始中、嘗避此山、仍有終焉之志。村民野老、競來諫曰、山多狼虎毒蛇、所曰久絕行踐。僧紹曰、毒中之毒、無過三毒。忠信可蹈水火、猛獸亦何能爲。乃刊木駕峰、薙草開徑。披拂褰縷、結構茅茨。廿許年、不事人世、渡

河息暴擾，值無立，皆曰：誠至所感，有法度禪師家本黃龍來遊白社，梵行殫苦，法性純備，與僧紹冥契甚善。嘗于山舍講無量壽經，中夜忽見金光照室，光中如有臺館形像，豈知一念之間，人王照其香蓋，八未曾有。淵石朗其夜室，居士遂捨本宅，欲成此寺。即齊永明七年正月三日，度上人之所構也。山清率易，野製疏朴，崖檐峻絕，澗戶幽深，卉木滋榮，四時助其雕綺，煙霞舒卷，五色成其藻綯。居士嘗夢此巖有如來光彩，又因閒居，依稀目見，昔寶海梵志睡觀花臺，智猛比丘行達影窟，故知神應非遠，靈相斯在。居士有懷創造，俄而物故，其第二子仲璋爲臨沂令，克荷先業，莊嚴龕像，首于西峯石壁，與度禪師鑄造無量壽佛坐身三丈一尺五寸，通座四丈，并二菩薩倚高三丈三寸，若乃圖寫瓌奇，刻削宏壯，蓮花瑩目，石境沈暎，藕絲縈髮，雲崖失彩，項日流影，東方韶其大明，面月馳光，西照匿其成嵬，大同二年，龕頂放光，光色身相，晃若炎山。

林閒樹下、拖如火殿禪師自識終期、欣瞻瑞應、曰建武四年于此
寺順寂、豈非六和精進、十念允諧、向沐寶池、方登金地者也、齊文
惠太子豫章文獻王竟陵文宣始安王等、慧心開發、信力明悟、各
捨泉貝、共成福業、宋太宰江夏王霍姬蕃、閨內德齊、雍州刺史田
英、方牧貴臣、深曉正見、妙識來果、竝于此巖阿、廣收財施、琢磨巨
石、影擬法身、梁太尉臨川靖慧王道契、眞如心弘檀密、見此山製
置疏闊、功用稀少、曰天監十年八月、爰撤帑藏、復加瑩飾、綴曰丹
青、鏤之銑墨、五分照發、千輪啟煥、排天堂廡、玉露分色、接岫軒墀、
翠微抽影、八定之侶、步纖草而揚梵、三慧之僧、挹飛泉而動色、喜
園凝靜、豈傲吏之凡遊、深谷虛玄、非愚公之俗路、是曰王公搢紳
之輩、郎吏胥吏之屬、步林壑、陟皋壤、升精舍、拜道場、無不洗滌、無
明、粹濯、翳暗、非直心之砥路、孰能如斯者乎、慧振法師志業該練、
心力精確、度上人將就遷神、深相付囑、法師聿修厥緒、勸助眾功、

基業田園多所創置先有名德僧朗法師者去鄉遼水問道京華清規挺出碩學精詣早成波若之性夙植尸羅之本關方等之指歸弘中道之宗致北山之北南山之南不遊皇都將涉三紀梁武皇帝能行四等善悟三空曰法師累降徵書確乎不拔天監十一年帝乃遣中寺釋僧懷靈根寺釋慧令等十僧詣山諮受三論大義賈誼曰學聖道如日之明孫卿云登高山知天之峻今之採賸其此之謂南蘭陵蕭繹幽棲抗志獨法絕羣遁世茲山多歷年所臨終遺言葬法師墓側還符田豫託西門之冢更似聚鶴偶要離之瘞又案神錄云楚靳神在今臨沂縣齊永明初神詣法度道人受戒自通曰靳尙卽楚大夫之靈也大同元年二月五日神又見形著菩薩巾披袈裟閑雅甚都來入禪堂請寺眾說法崑嶺之中百神所在首陽之路八駟竝驅未有修淨戒之品詣得道之僧整忍辱之衣入安禪之室是知名山大澤靈異憑依者矣慧布法師

幼落煩惱、早出塵勞、律儀明白、貞節峻遠、貫綜三乘、不自媒衒、楷
模七眾、無所詆訶、曩日靜聰、鍾巖余便觀止、滄仁飲德、十有餘年、
頃于攝阜、受持珠戒、佩服之敬、雖敢忘于斯須、汲引之勞、且曷伸
于報效、夫言意難盡、鉛槧易凋、固比河山、莫如金石、凡諸徵應、并
預隨喜、竝勒千碑左、乃爲頌曰、

漫漫心火、冥冥世流、論生若寄、喻死如休、三明未了、十智難周、盡
纏癡愛、豈離瘡疣、敬仰鷄足、蒸開鷲頭、斯風可羨、其路何由、我開
梵宇、面壑臨丘、我圖靈迹、果植因修、兼金畫繪、勒石彫鏤、連雲出
沒、泄雨沈浮、經行松磴、禪坐蕙樓、湖風長瀉、崖溜懸抽、花臺似雪、
夏室疑秋、名僧宴息、勝侶薰修、三乘謂筏、六度爲舟、金幢合蓋、寶
駕驅輶、地祇來格、天眾追遊、五時無爽、七處相侔、辭題翠琰、字勒
銀鈎、賢乎樂餌、過客宜留、

大莊嚴寺碑

蓋聞僧伽水濱波斯創曰禪地醍醐山頂舍那肇其梵域此乃往
劫之勝因上方之妙範于是俯察地勢懸之曰水仰惟皇極揆之
曰日百堵咸作千坊洞啟前望則紅塵四合見三市之盈虛後睇
則紫閣九重連雙闕之聳峭加曰園習歡喜水成功德池溢甘露
不因玉掌樹搖音樂無待金奏薰鑪夜焚遙來海岸之香法鼓晨
謹非動泗濱之石擢莖金表跨八萬之俱成界道銀繩面四衢而
拓製廁璧綴珠凌丹霞而結宇雕光鏤采望紫極而開軒俯看驚
電影徹琉璃之道遙拖宛虹光徧水精之域層楹刻桷風伯走而
未升靈檄飛簷雨師攀而不逮銘曰

灼爍金莖崔嵬銀表翔鸞羽翥威鳳靈矯木密聯綿香泥綠繞日
圓檐外荷披棟杪翠落陰虬珠填陽島高僧累萃傾學茲多弘宣
方等博綜圍墮皆傷寸晷竝悟尺波式旌鏤碣無待雕戈標年剎
土比數洹河

羣臣請贈武帝懺文捨身

某位某甲稽首和南十方三世一切諸佛十方三世一切尊法十方三世一切賢聖見前大德僧皇帝某菩薩睿哲聰明廣淵齊聖心若虛空照窮般若發弘大誓荷負眾生神道會昌膺茲景業百王既季運屬艱難五嶽維塵六軍日動劬勞在念有切皇心既而深悟苦空極言無我寶臺華柱本非實錄賊城樓櫓苦具茲多遂坐道場靜居禪室堅固善本具足檀那石壁山河珍重寶馬頭目髓腦妻子國城鑾輅龍章翠帳玉几福德所感威惠所及莫不肅然大捨供養三尊便欲拂衣崆峒高步六合到林閒而冥坐與釋衆而同遊紫微虛宮黃屋曠位上靈聳動厚土怔惶弟子等身纏愛惑業構煩惱天生烝民樞日司牧懞懞黔首非后罔戴豈容尊居萬乘而伸獨往之情應在帝王而爲布衣之事且蠻夷猾夏寇賊姦宄燧人警職日照甘泉之火四郊多壘未肆樓船之威若使

七聖遐迷、冒然汾水之上、八駿沃若、方在瑤池之濱、則天下何依、羣臣莫奉、宗社廟堂、有廢彝則、弟子不勝狼狽之切、謹捨如千錢、如十物、仰覲三寶、大眾奉順、皇帝及諸王所捨、悉還本位、伏願十方三寶、見前大德、僧已慈悲、力用無礙、心坐道放光、顯揚宣說、歡喜和合、超然降許、當使皇帝望雲望日之姿、與南山等固、乃神乃聖之德、與北極同尊、中宮后妃之星、金楨玉幹之戚、窮積善之慶、盡萬歲之懽、玉鑾迴鑣、金門洞啟、百辟翹首、搢紳竝列、願塵勞與雲沴俱銷、億兆與天地同泰、懽懽丹愚、敢已死請、弟子某和南、弘

賜進士出身二品銜廣東等處提刑按察使司按察使兼管驛傳事務黃岡王毓藻校刊

全隋文卷十一終